



In disen spiegel sollen schowen  
 All gschlecht der mēschē man vñ frowē  
 Je eyne ich by dem andern meyn  
 Die man sint narren nit allein  
 Sunder findt man ouch nārrin vil  
 Den ich die schleyer / sturtz vnd wile  
 Mit narren kappen hie bedeck  
 Metzen hant ouch an narren rōck  
 Sie wellen yetz tragen on das  
 Was ettwan mannen schāntlich was /  
 Spitz schū / vnd vßgeschnyttten rōck  
 Das man den milchmerck nit bedeck  
 Wicklen vil hudlen in die zōpff  
 Grof hörner machen vff die kōpff  
 Als ob es wer ein grosser stier  
 Sie gānd har wie die wilden thier /  
 Doch sollen erber frowen mir  
 Verzyhen / dann ich gantz nit jr  
 Bedencken zū keym argen wyl  
 Den bösen ist doch nit zū vil  
 Der selben man ein teil hie fyndt  
 Die inn dem narren schiff ouch fyndt  
 Dar vmb mit flyß sich yedes süch  
 fyndt es sich nit in dysem büch  
 So mages sprechen / das es sy  
 Der kappen vnd des kolben fry  
 Meint yemant das ich inn nit rür  
 Der gang zūn wysen für die thür  
 Vnd lyd sich / vnd sy güter dyng  
 Byß ich ein kapp von francfurt bryng

a.iiij.

